

摘藻堂四庫全書薈要

集部

欽定四庫全書薈要

集部

御選明詩卷十一

詳校官原任主事

臣李斯咏

欽定四庫全書薈要卷一萬八千五百十一

集部

御選明詩卷十一

樂府歌行八

李攀龍

團扇郎

白團扇明月入君懷清光滿流盼霜雪散炎天是儂歌
始變合歡自一時秋風歡不見

前溪歌

逍遙東武亭下有獨桑路歡但宿儂家前溪不可渡
朝思出前溪暮思出前溪溪流亂漫下誰見倚門啼
女蘿著長松蔓與長松長雖非歲寒姿願得被風霜
黃葛生溪邊溪水東西流枝枝自纏繞葉葉自綢繆
春容故易老紅粉豈常鮮郎歸定何日憔悴復誰憐
憐亦異當年

誰能采黃葛逍遙獨桑頭黃葛斷還生春風不可留
爛漫使儂愁

葵藿自有心
蘭蕙自有香
黃瓜一小草
春風獨不忘
枝葉頓芬芳

夜度娘

儂來星始集
儂去月將夕
不是地上霜
無人見儂跡

紫騮馬歌二首

出入渭城中
少年獨妍雅
不知是阿誰
但識紫騮馬
問客復何為
昨日發東平
袖中出短書
心知自劉生

懊儂歌

長江得春風使帆如使馬朝發牛渚磯暮宿白門下

王世貞

雞鳴歌

銀河迢迢星爛爛汝南雞鳴夜將半行人出門中道歎
欲歸不能何時旦曲陽酒酣起更衣新聲乍移霜乍飛

長相思

長相思望難期美人如花隔深閨輕霜剪澀凝臙脂青
黃碧綠諸色絲織成鴛鴦心自悲兩心為一心明月照

秋水一心成兩心各懸三千里昔為比翼鳥翼折不能
飛今為雙星界河漢年年夜夜盼光輝

採菱曲

蜻蜓刺水去不復畏歌斜渠自愛菱角儂自愛菱花

江南樂二首

少小閭門住不愛閭門道約伴禮社還羞人道儂好
與歡臯橋別日日上臯橋不比西陵浦惟看兩度潮

襄陽樂

大隄諸女郎妝成出芳閣瞥見千樹空餘花亂飛落道
是避妾妝不信風雨惡

西宮怨

點點蓮花漏未央乍寒如水透羅裳誰憐金井梧桐露
一夜鴛鴦瓦上霜

小伊州

頻年轉戰未封侯還逐高陽酒伴遊醉後祇今愁出塞
雙鬟又唱小伊州

從軍行

蹋臂歸來六博場
城中白羽募征羌
相逢試解吳鉤看
已是金河萬里霜

置酒行

置酒高堂上
樂聲慘不發
手抱三鷗絃
檀槽如秋月
此樂名為誰
言是羌中出
本以寫哀思
云何娛賓客
聽曲各稱好
竟令沈懷鬱
繁響赴流光
悠悠逝倉卒
末坐而楚衣
一聽三歎息

僊人篇

結茅華山顛上有蒼麟車仙者四五人要我偕所如遨
遊天漢上經歷萬里餘人間所見星乃是千白榆玫瑰
切庭階木難交綺疏不知何宮殿但怪非人居呀然珠
簾起四角垂流蘇中坐太乙君夾侍青童妹飲我丹霞
漿令我易肌膚碧藕錯朱桃玉饌芬且腴天樂不能名
但用窮歡娛回首望故鄉妻孥不得俱坐此一念謫聊
復在泥塗疆疇雖歷歷他姓治田廬欲返渺何用惻愴

但舍吁

企喻歌

男兒好橫行橫行身自樂
那見摩天鷄結伴尋鳥雀
女子愛妝束妝束頭上釵
男兒愛妝束妝束坐下騎

折楊柳歌

懊惱楊柳枝牽地黃金絲
門前不種爾那得綰別離
桃花二三月故愛東風吹
阿母不嫁女忘取少年時

歡聞歌

感歡千金贈亦擬報千金數盡人間物無如儂寸心

洞庭兩山竹枝歌

橘綠橙黃香滿枝甕頭篇玉鱸魚絲山中厯日由來少
知是江南九月時

謝榛

江南曲

夾岸多垂楊妾家臨野塘手拈青杏子不忍打鴛鴦
夾岸多楊柳妾家近塘口中有斷腸花郎君不迴首

行路難

荀卿將入楚范叔未歸秦花鳥非鄉國悠悠行路人

塞下曲

飄蓬燕趙間行李風霜下蘆管送邊聲空林一駐馬
塞上黃鬚兒飲馬黑山澗彎弧向朔雲莫射南飛雁

別調曲代贈所知

家住鄴城門向西青樓上與鄴城齊郎行好記門前柳
春夢南來路不迷

離筵易醉夜將分
趙舞燈前猶向君
從此腰肢瘦無力
牀頭閒殺藕絲裯

木落天寒郎欲行
樽前離怨一鳴箏
燕姬纖手調新曲
不是西樓今夜聲

遠別曲

阿郎幾載客三秦
好憶儂家漢水濱
門外兩株烏桕樹
叮嚀說向寄書人

搗衣曲

秦關昨寄一書歸
百戰郎從劉武威
見說平安收涕淚
梧桐樹下搗征衣

采蓮曲

湖上西風吹綺羅
靚妝越女照清波
折將蓮葉佯遮面
擢過前灘笑語多

春詞二首

城烏何意夜深啼
紅杏梢頭片月低
香冷薰籠人不寐
春風吹過玉欄西

羅衣初試薄寒生
荳蔻花間感別情
零落鉛華君不見
畫樓春雨燕雙鳴

春怨

紫綃揮斷淚闌干
窓下秦箏獨自彈
三月梨花風又雨
小樓燕子怯春寒

塞下曲

青海城邊秋草稀
黃沙磧裏夜雲飛
將軍不寐聽刁斗
月上轅門探馬歸

梁有譽

越江曲

橫塘風起送新涼
蒲葉拍波江水長
莫道春歸花落盡
中流還有杜蘅香

宗臣

送將歸

客子遠役兮駟馬馳
駕言長往兮適郊圻
念我同心兮
悵有違送君河橋兮牽君衣
問君去兮何時歸
恨無羽

翼兮同君飛歲暮不歸兮當誰依

有所思

有所思乃在大海南海路一何長海水一何寒迢遙千
萬里上有蓬萊山山中有真人顏色如渥丹青霞為君
衣紫霞為君餐桂枝夾道旁上長青琅玕羣仙三五人
遊戲青雲端赤螭為前驅蒼龍護其關月下散瑤步玉
聲何珊珊我欲往從之道路阻且難中心悵有違慷慨
起長歎

採蓮曲

紅妝翠袖歌採蓮
三三兩兩鬪嬋娟
欲行不行落金鈿
落金鈿垂玉指
發青蘋照綠水

關山月

良人一別妾仗劍
遠從戎涕淚青樓裏
音書紫塞東關
河秋色動機杼
月華空亦有寒衣在
年年望北鴻

江上行

浮雲壓地烏夜啼
家家人聽作天雞
王孫何事復遠遊

江南芳草春萋萋陶令亦有五柳宅秦人常憶桃花谿
英雄偃蹇何不可顏色肯為時人低君看眼底相逢者
誰似江流不肯西

江南曲

客去悲江左書來滯隴西相思若春草無路不萋萋

吳國倫

春江詞四首

樓頭小婦拭春衣昨日看花今日稀暮雨偏深碧草色

東風不送王孫歸

繁花幾樹傍江潯
蕩槳回看似錦林
片片落浮江面去
枝頭誰見可憐心

折柳溪頭聞杜鵑
灌花臺上望歸船
不爭十日花禁老
奈可三春柳未眠

今春江色勝前春
桃李花時作意新
落盡未歸遊冶子
看來愁殺浣紗人

雞鳴歌

東方欲曙星皎皎雞人登壇望八表三唱傳呼曲未終
月散鐘鳴天下曉重城萬樹鳴烏鵲六宮並奏鈞天樂

江南曲二首

江南行採蓮蓮露如珠瀉白鳥翔其上遊魚戲其下
江南行採蓮蓮花曜朝日素腕刺船來朱唇唱歌出

烏棲曲三首

百花滿庭香滿室城上烏棲月初出燭下紅妝耀錦屏
玉指調絃郎自聽

沙棠為櫂蘭為橈
溪水照面芙蓉嬌
落日徘徊望江路
今夜風波郎莫渡

博山爐蕪水沈香
明月夜夜懸空牀
郎心轉動如車軸
酒家買醉娼家宿

莫愁樂二首

家對石城樓
門前溪水流
何處冶遊子
低聲喚莫愁
少年且勿喧
但聽莫愁歌
可憐今夜月
如此莫愁何

襄陽樂三首

襄陽諸女兒自負傾城色逢郎大隄南蹋歌大隄北
大隄十五女臨街學數錢何當沽酒客調笑酒壚邊
女蘿附長松不自知微薄因郎歲寒姿綢繆永相託

前溪歌

迎歡東武亭送歡獨桑路安得大海水盡向前溪注使
歡不得渡

張九一

甘州曲

刁斗黃昏靜戍樓年來邊塞不知秋
西風一片湟中水也解朝宗學漢流

涼州曲

霧下葡萄萬顆明笛中梅柳一時驚
朝來馬上饒歌曲翻出涼州水調聲

俞允文

春思曲

江南花時二三月少婦乘春逐芳節
心性穩愜含清真

弄影晴川自流悅青絲刻帶錦作裳寶扇輕搖翡翠光
芸房露冷春窓火蘭逕煙開粉膩香七彩明璫九華珮
紫縠文羅掩秋翠繡額花叢千萬色玉腕竒姿發春媚
含思緘情不相識步步遺芳去無跡迴簪轉黛飛參差
纔過東城又南陌南陌東城春事深離思杳杳花陰陰
坐對流鶯啼歇處閒窺清鏡理瑤琴晨鷗淒清不可聞
恨斷吳煙怨楚雲自是琴心挑不得還同孤月向黃昏

塞上曲二首

葱闌雪淨月蕭蕭大將功成玉帳高天馬不愁西極遠
上林新種紫葡萄

金鞍玉勒控龍媒
淬水芙蓉對日開
兵氣盡成煙霧起
夜深新破右賢來

盧枏

青樓詞

百尺高樓挂綵鴛
錦箏銀甲亂哀絃
夕陽西下簾深卷
望見西江萬里船

子夜吳歌

燕花敷錦繡楚舞醉羅裳
明月空悲妾白雲常似君不
知遼海上書信幾時聞

黃鵠篇贈羅封君就養還萬安

君不見黃鵠飄颻下太清
天風接引銅臺城仙雛銜羽
遠相慰嘯舞不覺煙雲輕
玉珮瑤鏘何所致熒熒上刻
瑤華字歸時持贈與盧敖
萬里螺川恣遊戲

李先芳

梅花落

江南臘月春寒芳吐新萼無媒寄遠人空唱梅花落

竹枝詞

梔子花心一點黃江頭日日抱清香郎心不解花心苦
露葉含啼枉斷腸

車遙遙

膏車何草草遙遙萬里道遠道莫致思倚輪望見之隻
輪不可行去客難為情駕車策馬輪已遠腸中車輪載

君返

玉階怨

蟋蟀鳴玉階
梧桐落金井
紈扇本生涼
錯恨秋風冷

石城樂

石城城下接隋隄
綠樹紅樓桃葉溪
到日江頭勞借問
莫愁家在畫橋西

李同芳

春詞二首

常年二月已清明今年清明三月中寄語尋春携酒客
桃花雖歇有東風

十千沽酒冶遊郎日指桃林是醉鄉花下停車鶯語亂
蹊邊拾翠燕泥香

擬艷歌行

越女秦箏手自調阿歡按節奏金鏡當筵忽漫永絃斷
笑倩懷中取鳳膠

歐大任

怨歌行

高臺風蕭蕭下澤波湛湛春草綠已萎遊子歲月深
駕言御松舟寫我繁憂襟昔來睢鳩鳴今已蟋蟀吟
遨遊將安歸弭棹迴塘陰代馬嘶隴首塞鴻翔漢南
我欲往從之江永思難任佇立睇川塗一寄瑤華音
行行採蘭茗聊以紓我心

烏棲曲

月落未落烏將棲可憐夜夜夜半啼閨中少婦停梭泣

淚濕鴛鴦不成匹

屠隆

山中吟

我家海上之青山山頭白雲時往還藤捎細月行花裏
水濺空巖灑竹間仙源有路春長入石屋無門夜不關
踏花只共野人語蕩槳真如沙鳥閒自從奔走江南道
馬蹄半入紅塵老生平耳目非我有俯仰眉嫵向人好
歲月其如石火何却逐浮名喪至寶昨夢丘中人題書

寄深省既報青山空復言白雲冷山空雲冷胡不歸荒
猿叫破秋天暝四明迴合無風塵八窓高敞開星辰洞
簫泠泠響空碧凌雲一喚樊夫人樊夫人偕雲華不知
何年棲紫霞十洲三島俱為家粲然忽啓玉齒笑笑我
不歸寂寞羞桃花桃花爛漫紅映天垂楊婀娜春風前
野麋亂飲幽澗水仙鼠倒挂洞門煙偶因騎馬衝泥去
憶得鋪花掃石眠

湖上曲二首

湖邊曾記踏花行
謾謾風篴十里聲
綠水青蓮人載酒
絳樓紅板伎吹笙

夜泊湖頭自唱歌
蘆花月白水禽多
芙蓉獨抱清霜老
一片寒香搖素波

長條曲

流水飛霞舊日恩
梨花寒月閉重門
清明陌上香車路
認得蕭郎不敢言

手碎琵琶斷玉簫
青青誰竟折長條
背啼紅袖逢人笑

歲歲春風恨不銷

江北謠

千錢與唱歌百錢與賣酒本是青州人家住黃河口

江南謠

日落晚天碧潮來江水渾漁燈楓葉下不覺到柴門

竹枝詞

木槿編笆土築牆田家住在水中央四月穿綿六月冷
門前夜夜稻花香

水仙愛種水仙花一灣江水廟門斜
女冠夜送小姑出
四野無人好月華

魏允中

去婦詞三首

半遮紅粉蹙雙眉
一片離心行路知
憑為語郎休望妾
妾歸猶似未歸時

雲雨陽臺舊路迷
千山明月照人啼
背風縱作孤飛翼
索勝金籠裏面棲

落花飛絮共悠悠怕入東風燕子樓為看武陵源裏水
斷腸東去不西流

招去婦詞

不見流鶯空見春憑誰傳語一沾巾若憐求友當年意
忍掃蛾眉別嫁人

重門無計困飛花春色傷心天一涯試向東風頻借問
斷紅吹落阿誰家

佳人一別永相望江北江南道路長莫上青樓度楊柳

重來朱檻結鴛鴦

胡應麟

塞下曲送王山人

平沙一望隴雲開
玉笛飛聲夜轉哀
萬里朔風吹不斷
梅花齊落李陵臺

塞上曲

紫電花驄白玉鞭
遠從都護出居延
清秋不辨龍城色
一片黃雲瀚海間

出塞曲

大獵漁陽罷椎牛上谷營酒闌飛騎去夜奪受降城

顧聞

折楊柳

芳草接金隄垂楊綠更齊夕絮離天遠春絲別霧迷曲
中青鏡改愁畔紫騮嘶紅樓歎少婦腸斷玉關西

采蓮曲二首

蘭舟終日漾蓮溪少女如花錦袖低含笑折來流水畔

紅妝兩兩鏡中啼

岸上金羈白馬郎溪邊紅粉斷人腸臨風背摘雙頭蕊
笑入荷花萬點妝

黃省曾

江南曲二首

荷葉何田田綠房披甫甫的的不成雙心心各含苦
旖旎綠楊樓儂傍秦淮住朝朝見潮生暮暮見潮去

黃中

長相思

妾夢一處所積雪滿空山覺來向人語道是玉門關
萬里傳郎信開緘喜欲狂報得郎身健遲歸亦不妨

高應冕

江上行

白日江上沒江雲滿滄洲鷗鳥各隨羣煙波何悠悠還
將不繫心送君千里舟相思不相見極目令人愁

蔡宗堯

麗情曲

蘭房過雨蕙徑空綠雲藹藹懷春風欹枕牙牀睡初醒
顰脂汗濕羅衣紅鴛鴦牽綉絲未歇軟瘦香肌倦如雪
玉麟墮地渾不知流蘇夜暖斜明月珠簾半捲春日高
海棠飛起雙蝴蝶

馮行可

擣衣曲

征夫萬里長為戌月明今夜知何處城頭啞啞聞烏啼

秋風淅瀝愁難寐起坐閒庭夜擣衣擣衣對影空垂淚
妾今夜夜愁君寒君心那得長相棄

許邦才

夜夜曲

柘枝按舞竹枝歌薌澤微聞玉頰酡銀燭漸昏爐氣冷
曲房明月奈人何

邵圭潔

楊柳詞

風流白面郎何處紫絲韁那似青鸕鶒雙飛楊柳塘

蘇臺竹枝詞

魚尾晴霞片片明鴨頭新水半塘生
平川蕩槳一十里
深巷賣花三五聲

袁表

湘妃怨

煙波杳何之汀洲鬱寒翠一江春水生
是妾相思淚

仲春龍

思婦吟

身在天涯夢在秦歸時未卜見時頻潯陽江上秋風過
傳得琵琶與別人

少年行

鏤金鞍子百花裝三尺流虹飲血光白日報仇官市上
青春調笑酒壚傍

徐棉

落花怨

曉起西園望空階
散落紅自嗟根蒂淺
不敢怨東風

潘緯

蠶婦吟

采桑復采桑無嗟為蠶飢
食君筐中葉還君機上絲
還君絲織君綺貧女養蠶
不得著惜爾抽絲為人死

李奎

陽春曲

三月江南春草芳
水邊柳絲百尺長
流鶯乍轉千金堰

紫燕雙棲文杏梁家家曲裏調鸚鵡處處簫聲引鳳凰
鳳凰臺上花爭發翡翠樓前鳥並翔別有藍橋通蕙渚
更憐斜狹接橫塘橫塘女兒多艷妝錦琴瑤瑟為誰張
能歌白雪留人醉不管春陽斷客腸

萬表

江南曲

客從潮陽來夜泊秦淮口鄉語人不知兒童聞拍手

張元凱

閨詞

憶昔初嫁君明珠照綠雲今日君離別飛蓬亂不結忘
我久食貧遊趙復遊秦秦人未逐客安能返鄉國
琴瑟昔在御莫不靜而好自君久別離房櫳生青草彈
琴無知音調瑟多苦心絃繁曲亦亂月落花陰陰

邊詞

久隸行伍間尚在偏裨下寒霜生鐵衣秋風勁弓弛執
鞭乃吾分窘辱何須訝衛青亦人奴敢遽辭笞罵

采菱詞

菱角何纖纖菱葉何田田
鴛鴦與鸕鶿對對浮清川
采菱白晳郎蕩槳後復前
偶逢西家妹隔浦來采蓮
嬌容入花亂素腕隨苕牽
要住語綢繆風動裊帶偏
采采忘采角但采葉在船
贈我雙蓮子庶幾不空還

匣劍行

生長夫差國家住專諸里
鍛鍊昆吾成一匣明秋水
秋水泠泠聲遶扉淒清中
夜蛟龍歸空廬獨抱朗月卧
高

天颯動霜華飛提携神物無人覺何來白虹長在握鋒
芒衛霍耀天山精靈荆聶傾河嶽結客紛紛向五陵呼
盧博采且浮沉寧輸百萬留三尺懸在腰間酬寸心鵬
鷖新淬光如玳照見人間不平事玉玦金鏐日月閒匣
中一朶明珠淚嚴城吹角秋夜清風淒月肅鄰雞鳴擘
衣起舞欲拔劍無乃歲久青苔生莫牙空老無人齒世
人共寶鉛刀耳幕南塞北行路難酬恩報怨竟誰是淪
落沉埋一薊綏恥將彈鋏動諸侯豐城不掩干霄氣越

石何嗟繞指柔

張如蘭

步虛詞天妃宮作

春入仙宮放碧桃
月華一點映初潮
夜中斗柄方移轉
雲外仙童弄玉簫

陳鶴

麗人篇

雲為蟬鬢霞為裳
文軒繡戶逞新妝
白蓮未作風中色

丹桂先移月裏香
洛川立處花橫水
楚館歌時聲在梁
傷心半倚同心扇
留客雙飛並蒂觴
楊柳垂絲空繫念
蛺蝶聯羣只斷腸
欲把芳心託絨素
錦書雜淚不成行

桃花美人行

鸞幃鴛閣戀無因
珠鏡牙牀久自塵
相逢柳絮心還亂
相見桃花意轉新
聊作逍遙步獨立
可憐春春日春花
復可憐春心飄蕩
詎能前自知顏色
非春色自惜今年
異昔年眉凋難學
柳步弱不成蓮臂
褪珊瑚釧鬢謝鳳

凰鈿行隨雙蜨偏羞寡坐同孤月却憎圓羞寡憎圓兩
意深桃花桃葉一般新但識花心非妾性不將折取寄
離人

相逢行贈孔員外

白馬綰青絲華鞭控錦羈蹀躞黃金陌照耀綠楊枝來
自鄞江道還過越溪水相逢碧荷畔共入花間語

陳第

後出塞

萬里秋風海上生驅車今復戍檀城天寒夜渡韋溝水
馬尾凝冰碎有聲

陸之裘

黃雀兒

黃雀兒無食我穀家中有釜縣裏有斛黃雀兒爾胡不
仁朝食我穀暮食我穀東家無網羅西舍無黏竿南村
無弓箭北鄰無彈丸家人為汝辛苦不得閒黃雀兒莫
欺人城中小兒利汝肥捕汝日暮鬻市門黃雀兒莫飽

食飽食身漸肥東飛化為蛤

呂時臣

襄陽蹋銅鞮

青蒲沒漢水白馬度襄陽男兒但得意何處非故鄉

徐渭

射雁篇贈朱生

去年射雁黃浦口三軍進酒齊為壽今年射雁復何處
海舶停沙大桅豎君本臨洮豪傑士漢時六郡良家子

作客羞為堂下人
射生慣落雲中羽
腰間束矢插兩房
連年驅賊如驅羊
轅門待士近不薄
朝來歸興何洋洋
丈夫有遇有不遇
去留之間向誰語

沈明臣

前溪曲

林塘何處好
獨有前溪路
笑語隔花聞
歌聲連水度
歌舞向前溪
前溪明月裏
莫道春夜長
春光似流水
春水前溪長
春雲綠樹齊
門前車馬散
正及曙烏啼

前溪浣紗去花落汚春泥騎馬儂邊過見郎頭自低
汲水向前溪空瓶儂自提郎家溪上住只是隔東西

子夜四時歌

東風吹月出照見妾家樓蕩子從戎去邊霜尚滿頭
河漢青天轉空房丹鳥飛汗從郎背拭香是隔年衣
桂影團團月芙蓉葉葉霜搗衣過夜半幾日廢流黃
凍折銀瓶水塵枯寶瑟絃非關妾無夢妾夜幾曾眠

遊女曲

逸態嬌姿襲蘭麝宮前風柳腰肢借翠盤流雪珠衣卸
珠衣卸歸曲房憐夜短惜春長

采蓮曲

生長江南慣采蓮棹歌聲裏鬪嬋娟十三十四年相亞
覆額低眉各可憐

荷葉蓮枝水面齊采花歸去夕陽低綠蕪一道分南北
猶有歌聲繞大隄

少女明妝出采蓮雙頭並蒂獨心憐不知金釧何時墮

空手來歸意惘然

白面紅妝二八春
藏羞不肯過東鄰
偶從綠水橋邊去
誰道荷花妬殺人

月照波紋似鴨頭
一船雙槳蕩中流
采蓮不道羅裳濕
歸曬雕欄夜不收

妾在江東郎在西
采香曾到若邪溪
同行女伴低頭說
淚染新紅白苧衣

采蓮童曲

小童玉不如手攀荷葉嬉鴛鴦驚起去花下女兒知

少年行

寶馬嬌嘶引少年青絲牽地鐵連錢錦街十二春風起
吹得楊花滿繡韉

夏夜曲

月白金鋪水閣開夜涼星漢在瑤臺佳人自度前溪曲
聲入荷花風裏來

前艷曲

翠被憑誰攜鄂渚巫山空自說行雲若將花比君顏色
花為東風減十分

靈和殿柳欲三眠吹盡東風未著綿張緒不來腸已斷
小樓無賴夕陽前

蘭皋別業竹枝詞

青黃梅氣煖涼天紅白花開正種田燕子巢邊泥帶水
鵓鵲聲裏雨如煙

雨過高田水落溝瓦橋魚上柳梢頭梅子青酸鹽似雪

櫻桃紅熟酒如油

呼雛逐婦總堪憐
時雨時晴各一天
厨割小鮮來海市
菜添新饌出江田

烏桕紅紅生穉葉
紫蘭茁茁吐新苗
龍鬚綠折風前笋
鳳尾青添雨後蕉

園中高樹鳥分窠
門外小池錢貼荷
曉散烏鴉千點細
晚歸白鷺一行多

麥葉蟬肥客可餐
棟花鱗熟子盈盤
家家鍛磨聲初發

四月江村有薄寒

若邪詞

嫣然越女勝荷花
蕩漾輕舟過若邪
紅藕牽絲風欲斷
綠楊撩影日初斜

采香謠

吳姬十五采紅香
幾陣風飄羅帶長
蓮子池頭青簇簇
低飛只恐礙鴛鴦

夏宮樂

卧起丹綃晝漏遲傳宣又作納涼期微風桂樹千秋殿
明月荷花百子池

西湖采蓴曲

西湖蓴菜勝東吳三月春波綠滿湖新樣越羅裁窄袖
著來人說似羅敷

子夜歌

一曲春風子夜歌相望只是隔銀河梁間片月盈盈水
不照郎君照妾多

兩曲紅綾子夜歌
鴛鴦夢醒較誰多
合歡不是裁縫狹
織女機頭少一梭

三曲行雲子夜歌
不禁朝暮眼前多
雙星合處偷看月
到得儂邊沒絳河

周天球

中秋長干曲

內橋南走是長干
十里平鋪白玉寒
踏盡馬蹄塵不動
半窓明月此中看

花燈百隊走兒童盡道仙娥降月中縱是霓裳看不見
白毫光裏度香風

玉笙低引紫簫長不許商音斷客腸聽到月斜纔入破
飛來七十二鴛鴦

居節

吳門春遊曲

濠上花深翡翠樓樓前白月湧江流香風兩岸笙歌合
夜夜燒燈照客舟

春江花月滿春煙
夜夜琵琶宿畫船
城上烏啼霜又落
紫檀槽煖不成眠

誰家年少恣春遊
翠幄朱旗三櫓舟
齊唱棹歌江似沸
黃鶯啼殺不回頭

周詩

寒夜曲

少年離別不堪言
每聽砧聲欲斷魂
不是羅幃怨明月
向來愁緒怕黃昏

唐詩

采蓮曲

風微波不起日暮未迴船
貪看鴛鴦鳥時時誤采蓮

岳岱

折楊柳

垂柳挂江頭朝朝上綺樓
折來無遠使遊子在邊州
雨送參差淚花飛歷亂愁
蛾眉空悵望歲月易逢秋

東飛伯勞歌

東飛伯勞西飛燕玉關巫峽難相見春時寄書人不歸
秋風一夕繞羅幃鳴絃寫怨感孤凰含愁下機懷七襄
熠燿宵行穿落葉瑣窓燦燦流斜月鳳樓螭水聲未終
日照深閨衣淚紅

鄭元撫

折楊柳

孌孌河隄柳年年送別離攀條不忍折拭淚強相持弱
態君應惜柔情妾自知春來愁幾許試看向南枝

吳琬

采蓮曲二首

軋軋蘭橈鳴雙雙屬玉起不見采蓮人知在蓮花裏
采得雙蓮蓬中有百蓮子一一自生心外面空相似

吳爰

南江歌贈馮侍御

我聞南江水發源岷山下延袤至潯陽一派分九派自
東一折入淞江千里遙遙無限界君家正在淞之隅黃

金
卷十一
茅一搭為安居座有丹山碧水之雅趣案有百家諸子
之畱畬朝飲淞江水暮食淞江魚淞江之水即是南江
水水木本源情敢違嗚呼水木本源情敢違

御選明詩卷十一

欽定四庫全書薈要卷一萬八千五百十二

集部

御選明詩卷十二

樂府歌行九

朱楊仲

楊花篇

江南二三月楊花競芳華寂寞長條攀折盡綠絲飛來
千片花千片飛飛西復東白雪晴雲晝溟濛風吹滿空
翳白日散入千家池館中池館樓臺媚春晝珠箔重重

散花柳白玉筵中拂畫衣琉璃杯裏沽春酒落日千家
春酒闌飛花拂拂玉闌干高處餘風常不定低邊日氣
轉猶寒秦女樓中妝鏡寂王孫道上相思憶詎將春色
報深閨還惹游絲度南陌南陌深閨兩地情惜此飄揚
花性輕焉知落地為香土更憐入水作浮萍香土浮萍
那堪數虛令春色年年度今年已見柳花殘明年復見
楊花吐愁殺龍沙千萬山春來春去損朱顏祇被楊花
惱妾睡不教清夢到燕關

雙溪曲

脉脉溪路遙
汎汎落花嬌
人心不如水
相隨下河橋

西湖采蓮曲

五月芙蓉浦
花開勝若耶
若將湖作鏡
應照妾如花
玉腕搖輕楫
紅蓮暗綠波
花深欲無路
棹轉忽聞歌

楊柳枝詞

廣陵楊花辭
故枝各自空
條雨後垂
羌笛不知春
自去分明一曲
月中吹

長干曲

美人家住漢水濱
夫婿從軍久向秦
江口寄書無便使
客中多是洛陽人

王叔承

竹枝詞十首

月出江頭半掩門
待郎不至又黃昏
夜深忽聽巴渝曲
起剔殘燈酒尚溫

白帝城高秋月明
黃牛灘急暮潮生
送君萬水千山去

獨自聽猿到五更

陰陰桃李晚妝遲
萬里橋頭叫子規
拜月歸來人語靜
金釵失在竹廊西

楊柳青青酒店門
阿郎吹火妾開樽
千金賣得文章去
不記當時犢鼻褌

蘭橈小小葉為船
蕩漾紅妝下錦川
淚落清波君不見
秋風吹老並頭蓮

生年十五棹能開
那怕瞿唐滌滌堆
郎今曬網桃花渡

奴把鮮魚換酒來

點點流螢送落花春風寂寞斷琵琶人來寄與菖蒲葉
說是成都造紙家

白鹽生井火生畬女子行商男作家
種布紅衫來換米
滿頭都插杜鵑花

綠酒媚媚白玉瓶
醪醕花發語猩猩
竹枝歌斷人無那
十二峯頭暮雨青

避人低語卜金錢
侵曉焚香拜佛前
見說嘉陵江水惡

莫教風浪打郎船

西湖歌

蘇小墳西是妾家門前都種白蓮花郎來好認當壚處
石上瑤琴覆落霞

揚州歌

二十四橋邊當壚誰可憐妝成窺客坐不奈數青錢
金陵艷曲

綠江天作塹翠嶺石為城柳暗黃金塢花明白玉京春

風十萬戶戶有啼鶯

黃姬水

金陵古意

小婦家住金陵步門前朝暮揚子潮采花莫采無根草
折柳須折最長條

青門柳枝藏暮鴉經過遊子未還家桃葉渡頭可憐水
胭脂井上斷腸花

杏子雨晴天氣寒追尋桃李畏花殘朱雀航頭南去路

酒旗懸處是長干

綺羅逐隊沸歌謳盡在東城南陌頭
本為春愁拾芳草爭如芳草又牽愁

王穉登

荆溪採蘭曲

葉帶朝煙翠陸離花含春霧紫
葳蕤美人腸斷湘江水平折得芳馨欲寄誰

破雪穿苔一寸芽杖挑藤束出山家
幽香不上如鴉鬢

悞捲紅簾聽賣花

石門曲

採桑復採桑蠶長桑葉齊
妾住石門東郎住石門西
蠶成桑葉空門前青苧長
一半織郎衣一半結魚網

茉莉曲

滿籠如雪叫攔街喚起青樓十二釵
繡筐裝錢下樓買
隔簾斜露鳳頭鞋

烏銀白鎚紫磨金
斲出纖纖茉莉簪
斜插女郎倭墮髻

晚妝朝月拜深深

長安春雪曲

春風吹雪下桑乾
添得城中一夜寒
鳩鵲樓高消不盡
長安街上馬頭看

汪淮

紫騮馬

誰家白面郎跨下紫騮馬
跼蹐踏落花
驕嘶綠楊下
黃金絡馬首
白玉作馬鞭
盤旋不肯去
牆外看鞦韆

繡襪空中起湘裙風外飛倒垂倭墮髻妬殺路傍兒
為問馬上郎牆高復幾許海青不上天那得天鵝去

王逢年

折楊柳

邊樓夜笛吹霜月玉門楊柳邊人折長條短條繫相思
故園東風鶯轉枝鴛鴦機上腸應斷綠滿天涯人未歸
夜行郎二首擬古樂府寄所思

長寄相思明月樓夜行郎在海西頭月光若共郎行遠

那得當窓照妾愁

昔看明月不如郎同照菱花伴曉妝別後郎情寧似月
瑤階隨影度孤房

陸文組

子夜歌

染黛作儂衾持冰置儂枕城烏夜夜啼苦寒不成寢

詹斗文

天上謠

千尺仙臺冰玉軒雲中雞犬寂無喧
桂花渾白如人世
露濕霓裳冷不翻

鄭惟勉

春怨

玉砌繡青苔花落香泥濕下簾
秦雲和春風復吹入

湯儒

玉階怨

朱螢螢影度璧月綺疏流
斗女年年會玉階
今夜愁

黃鳳翔

四時子夜歌

枝喧對語鶯堂巢雙飛燕良人一分袂十載不相見
雪藕絲中斷采蓮蒂復雙豈乏琅玕簾含愁倚碧窓
獨鶴警露鳴寒螿啼徹曙夜夜砧杵聲征衣寄何處
素霰風逾急青燈火亦寒不知羈旅地形影雙與單

沈一貫

朱顏曲

朱顏非自換良為篋鏡欺篋鏡終不發朱顏終不移歌
罷月在梁影落闌干垂感君明月心不棄秋風姿猶記
覆耳髮挂君飄纓髭宛轉結不解煩君立移時

采蓮詠

鏡中美人明月光瓊肌玉腕相芬芳凌波而往褰素裳
桃李不敢誇朝陽採蓮歸來還採菱楫短潮逆嬌不勝
牽浮攬沈亦自矜槎牙四角生寒冰南山桂花飛上層

于慎行

子夜歌

秋月照四壁
絡緯當窓織
徒聞機杼聲
終夜不成匹
始欲識歡時
願作同心結
絲綫不相逢
裏許暗自別
枕上看月來
夢中與歡訣
月自不相離
歡心不如月
儂如水中石
波至亦累累
歡如陌上塵
左右從風吹

子夜春歌

朱景帶碧樓
新風吹羅幌
誰能懷春情
不發柔絃響
金屋燕初飛
長隄草已綠
春蠶不作繭
思子何由續

子夜夏歌

何處復無暑月出湖水邊
汎舟芙蓉裏分明自取蓮
含桃初作花畏恐傍人見
今日食含桃空條誰復盼

子夜秋歌

涼風夜中來白露凝如玉
不敢拭清砧擣衣亂心曲
露井凍銀牀秋風生桐樹
任吹桐花飛莫吹梧子去

子夜冬歌

萬里覆寒雲千林飛素雪
此時為歡愁心如三伏熱

華茵倚重爐璇房卷羅幕驚見雪花飛謂是楊花落

讀曲歌

儂作博山爐雙烟吐不住郎如飄風吹但將香引去

大隄曲

大隄春盡花如雨大隄女兒隔花語揚州估客四角幘
暮泊蘭橈宿江渚芙蓉寶帳綠雲鬟翠簾銀缸夜色寒
倚瑟當爐春酒盡卷帷望月曉寒殘石城一曲歌未足
日出天空江水綠含啼送客更多愁腸斷煙波萬里秋

少年行

錦帶珠袍綠臂鞬相逢盡說富平侯
南山夜獵春城晚繫馬新豐舊酒樓

范謙

學猗蘭操

猗彼蘭兮空谷之盤兮子之不采何以為餐兮
白露皚皚倚蘭采采空谷無人幽香自在子之惠兮
伊蘭之穗兮紉以為佩兮

顧大典

金陵楊柳詞

太液池頭欲暮春
誰家玉笛按歌新
飛花好趁東風去
為覓高樓獨倚人

郭子直

采菱曲

采菱復采菱
采采日已暮
貪看馬上郎
迷却花間渡

馮時可

烏棲曲

綠水如鋪煙如織楊柳藏烏日西匿閒倚蘭橈望碧空
采蓮一曲寄江風

月華為壁星為珠吳姬朗潤色不殊彈箏手語心暗憐
那能含羞不自前

香杵瓊砧祇為君鴛鴦織錦闌螭文并刀未剪霜欲飛
留君不發候成衣

紺宇流霜翠被冷歡娛不覺秋夜永棲烏莫驚汝南雞

天河未落且休啼

江南弄

水如碧玉山如黛
山煙微微侵水靄
水上美人獨無賴
獨無賴不駸邁
舟搖曳斜陽外

采蓮曲

玉面芙蓉鬪妙妝
辟邪香氣逐花芳
清歌宛轉隨風揚
隨風揚為花賞
花無情傍人想

劉渾

帝京謠

山自城西入海頭
龍蟠遙障鳳皇樓
兵屯開府車書會
盡在燕雲十六州

裊裊垂楊蔭玉河
錦麟無數戲清波
光風細落晴烟動
日有行人擊壤歌

姚舜牧

自君之出矣

自君之出矣
妾守深閨裏
花落委泥中
誓不隨流水

趙南星

古意

錦織雙鴛鴦還自我為衣恐入他人手不解惜分飛
練練松月明泣泣花露墜人道是露水儂道嫦娥淚

子夜歌

美人著新裯細步不聞聲風來撼芭蕉絳綵使郎驚

呂坤

別意

留妾一身在憐君萬里行夜來雙淚盡不忍到長亭

邢侗

竹馬歌為濟南太守稿李沈公作

使君五馬馬五色兒童竹馬馬以百朝朝遲公阡與陌
胡為不夙來令我父兄頭漸白

鄒迪光

西湖竹枝詞

杏子單衫窄地長褰拖八幅石榴香只知此日遨遊好

不信蠶家四月忙

子夜歌

儂若泰山石千年不轉移歡如西江水一去無還期
收却臨水妝去作當窓織如喜復如嗔為歡小唐突
為歡幾何時感歎復沈吟甘露澆黃蘗那得消苦心
憶歡無計策去向通衢立南北多行人未得歡消息

大隄曲

後行看前行連袂踏花裯前聲合後聲歌曲感人心

明妝隄上女連檣隄下客停舟亦停步相看不相識
日出踏青去日落猶未回盼殺江陵賈笑殺襄陽兒
雙蛾畫出好偷從花下度長恐羅裙揚不敢當隄步

范守已

雉子班

雉子班嘎嘎鳴中林黃鵠來掠青雲雲外噉噉遺好音
爾何不飛與我同歸前有網羅爾羽斑斑奈爾何雉子
蹌蹌惜毛羽我飛十丈樂未已翔以南翔以北朝向蓬

舊遊暮雒鼎耳側

馮琦

結交行呈楊公亮時公亮止酒

寒不作堂上燕飢不作韝上鷹韝上威稜豈不峻一飽
即掣非人情親極難為疎貴極難為賤長平未罷賓客
去何必貴賤交情見君不見步兵廚君不見濬冲壚長
安車馬夾道趨雲雨翻覆無時無君今不醉胡為乎

鄒元標

里婦歎

仰盼天中月流光入庭戶明月本無情何分新與故新者歡不足故者有餘慕笙歌亂四鄰孰念此荆布

窈窕誰家女雙手抱琵琶靜聽鸞鵲操心中亂如麻秋聲方戒節道路滿蒹葭所思在美人悠悠一水涯

鴛鴦水中鳥雙雙飛且鳴凡物皆有侶相應以同聲而我獨無儔況若水中萍萍開水見底照見別離情

陸可教

吳宮引

姑蘇臺前鳥飛絕
西施醉舞吳宮月
纖袿長袖香不歇
銀燭金釭半明滅
羅帳流蘇四垂結
銅壺丁丁漏水咽
伍胥大夫雙背裂

王士性

登岱宗觀海行

泰岱山頭一片石
影落滄溟浸空碧
鳥道捫星十八盤
峭壁回飈四萬尺
雞鳴赤日升扶桑
日觀峯高海水黃

徂徠梁父倒地伏咫尺顙氣摩穹蒼金書玉匣秋烟裏

七十二君呼不起長劒峩冠跨赤螭梁園之客石城子

振衣絕頂鬚眉開吳越周秦何壯哉把酒問天天不語

罡風颯颯天門回乘風獸嘆去東極化作蜃市成樓臺

老蛟奔走驪龍怒珠光吐射三峰摧夫君揮手招八表

明月轉向青天來蓬瀛明滅不可覩恍惚似欲揚塵埃

五松亭亭還舊壘白雲封中年代改欲刻懸崖紀姓名

恐妬山靈泣真宰君不見秦碑昔已斷漢策今安在莫

凭寥廓駕黿鼉但指陽烏即東海

徐桂

飛絮篇

江南三月艷陽時楊花如絮飛參差悠悠宛轉知誰繫
歷亂輕盈不自持可憐朝散銅池裏可憐暮落章臺市
閒逐遊絲去復來細縈花片低還起灞橋繫馬及芳辰
白門藏烏過上春吹入妝樓全誤粉飄將舞席半成塵
乍高隨鳥沒遙空漸屢起燕遶簾櫳花飛猗靡如迴雪

質輕流便不因風因風迴雪何綽約偏從芳面穿香閣
東舍王昌暫寄踪西鄰宋玉聊棲託跡方蕩子少寧居
命憐賤妾多輕薄其奈蕭疎欲盡春已覺繁華不如昨
條風布暖水流漸池邊林畔始垂絲小小葉間分翠黛
盈盈樹下鬪腰肢而今棄擲將何道而今轉薄同秋槁
攀條倚樹重留連行樂韶年苦不早淒淒草徑總鋪羶
茫茫榆塞詎成綿旦辭芳樹猶依榭夕化浮萍已逝川
子規聲裏千花歇搖蕩春光劇可憐

沈九疇

善哉行

今日樂兮來日可悲天迴地遊人莫之知一解彼絃我歌

會少離多明星可掇庸駕經過二解三十六幅輪輪相復

但惜馬蹄不惜車軸三解

馮大受

寄衣曲

寄衣相憶不相見殷勤只在手中線妾意殷勤誰共論

金
卷十二
一一抽鍼盡淚痕
淚痕點點濕不乾
幽鍼寄與良人看
妾身隔斷關山難

子夜四時歌

看花東城隅
聞笑不聞唱
相逢遊冶郎
逐逐走如浪
低頭羞露嬌
惜別轉相向

江畔巧妝鮮
短棹發清沚
不愁水濕衣
素手攀蓮子
香風正淡蕩
羅袂輕輕舉

郎住江水頭
妾住江水尾
別恨正悠悠
淚滴梧桐雨
背

窓一點燈簾幕秋風起

歲晏悲風號雪花瓊樓滿寒枕夜如年起坐珠簾捲悵
望長安道不知郎近遠

豔歌行

綺窓時時開柳陰拂青樓陌上誰家子踟躕不自由

一解

含思理瑤琴延望清宵月冷冷彈未終沈吟愁欲絕

二解

芳顏如桃李步搖何垂垂獨立起長歎長歎却為誰

三解

邢雲路

西湖竹枝詞

裏湖外湖春水深
斷橋不斷入湖心
郎在外湖唱吳曲
妾在裏湖吟越吟

楊于庭

黃淡思歌

淚作縷縻垂腸作車輪
轉寄郎錦襖襠相思不相見
歸歸黃淡思思郎無已時
郎向代州去馬頭絡青絲

張恒

涼州詞

壚頭酒熟葡萄香
馬足春深苜蓿長
醉聽古來橫吹笛
雄心一片在西涼

來知德

春風詞

春風起兮花殘有美人兮
江干三年不見兮
路漫漫遠
莫贈兮木難歲崢嶸兮
將暮心惆悵而難言及榮華之
未落何不驂夫翠鸞使我執手兮盤桓

春風起兮花落有美人兮江閣三年不見兮路渺漠遠
莫致兮金錯日窅窅兮下山竹紛紛兮解籜及青春之
未徂曷不跨夫黃鵠使我並坐兮偕樂

朱國祚

霄禱篇

朱鳥協上序蒼龍啟佳辰我后隆祀禮羣生潔明裡紺
筵羅彩旒瑤圖吐文茵雲歌逐清漢鳳管徹蒼旻蘭羞
既云薦精誠亦已伸靈液以時敘而康億兆人

少年行

長安少年意氣豪，雕鞍寶騎金錯刀。
呼盧百萬等土壤，報讎一死輕鴻毛。
自言生為遊俠子，願輸肝膽酬知己。
此時未遇平原君，且學鬪雞都市裏。
朝遊紫陌黃金堤，暮宿瓊樓桃李蹊。
探丸直向杜陵北，挾彈頻過渭水西。
一聞邊警還投袂，轉戰前收漠南地。
介子身封萬戶侯，嫖姚家賜千金第。

梅家蕩棹歌

梅家蕩口蜆子黃瓜皮留船七尺長剪取東園白頭韭
蛤蜊風味勝橫塘

周應賓

去婦詞

故人昨日新新人明日故同是機中人何必問縑素

朱長春

水口曲

漁舟入暮來沙色淨如洗潑潑白鷗鷁銜魚沒水底

寶劒行

荅黃紹夫壽春
守見送移琴川

吳門楊柳啼夜烏
廬山烟雨連姑胥
姑胥在南淮在北
一片東流江水白
壽州城中飲君酒
扁舟今下中江口
感君意氣干風雲
千金寶劒動星文
相思一別未相見
獨上胥臺倚孤劒

湯顯祖

黎女歌

黎女豪家笄有歲
如期置酒屬親至
自持針筆向肌理

刺涅分明極微細點側蟲蛾摺花卉淡粟青紋遶餘地
便坐紡織黎錦單折襪吳人綵絲綴珠崖嫁娶須八月
黎人春作踏歌戲兒女競戴小花笠簪兩銀篦加雉翠
半錦短衫花襪羃白足女奴絳包髻少年男子竹弓弦
花幔纏頭束腰際籐帽斜珠雙耳環纈錦垂羃赤文臂
文臂郎君繡面女並上鞦韆兩搖曳分頭攜手簇遨遊
殷山杳地蠻聲氣歌中荅意自心知但許昏家箭為誓
椎牛擊鼓會金釵為歡那復知年歲

盛萬年

右江謠

昭江灩灩連邕管千厓赭碧清霜滿竹雞格格啼榕林
修蛇毒霧愁浸淫鳥言卉服繡項渠荒茅叢菁山頭居
時平莫負篋篋弩夜雨叢祠賽銅鼓

袁宏道

紫騮馬

紫騮馬行且嘶願為分背交頸之逸足不願為追風絕

景之霜蹄霜蹄滅沒邊城道朔風一夜霜花老縱使踏
破天山雲誰似華陰一寸草紫駟馬聽我歌壯心耗不
盡奈爾四蹄何

春江引

溪潏潏草茂茂野桃露滴珊瑚紅花氣曉腥魚子浪柳
枝晴扇麥苗風美人羅袖撲香蕊科斗旋旋丁子尾百
舌欲止復衝人一聲滴溜芳溪裏

櫂歌行

妾家白蘋洲隨風作鄉土弄篙如弄鉞不曾拈一縷四
月魚苗風隨君到巴東十月洗河水送君發揚子揚子
波勢惡無風浪亦作江深得魚難鷓鴣充鮓臠生子若
鳬雛穿江復入湖長時剪荷葉與兒作衣襦

魚苗風洗
河水皆長

年語

桃花流水引

并序

花源棹返幽思縈懷枕上夢中如有所得命曰桃
花流水引亦仙家竹枝詞也

華陽中子碧絳環紫府簾前舊押班阿母筵頭爭一擲
醉中輸却小蓬山

竹枝詞

龍州江口水如空龍州女兒挾巨觥奔濤潑面郎驚否
看我船欹八尺風

陌上相逢盡楚腰涼州一曲寫吳綃鵬絃撥盡南湖月
更與唱歌到板橋

橫塘渡

橫塘渡郎西來妾東去感郎千金顧妾家住紅橋朱門
十字路認取辛夷花莫過楊柳樹

袁中道

懊惱曲

揚州夢覺到如今洛浦蕭條舊錦衾流水高山難再過
止緣同調倍傷心

青驄白馬渡江涯劇藕晴絲滿碧沙記得大堤十字曲
穿心一道過他家

珠簾斜倚太虛盈秋水梅花沁骨清欲識泥人魂斷處
當場一曲似春鶯

翻翻體態似驚鴻鸚鵡由來慧業同默默不言能解意
可憐心曲太玲瓏

醉餘花蕊壓青鬟飲興風騷未易刪猶記西園明月夜
滿階花影鹿胎斑

劉黃裳

邯鄲行隨張使君肖甫出獵

使君按節邯鄲城遊子邯鄲意氣生相從射獵西山去
城中年少來縱橫紛紛罷擲博場裏追呼雲集黃塵壘
白馬連環響夜霜凋弓香箭明秋水使君紅旗山上麾
我正揚鞭馳繡羈馬度長橋翻凍雪箭穿枯柳斷冰澌
山頭北風吹草急道上豺狼向人立少年隨我控青絲
一箭雙狼死原隰使君歡動弄金杯壘鼓鳴笳錦帳開
八郡良家驅虎落三河俠客奮龍媒邯水鄲山冷朔雲
趙舞燕歌空古墳海上惟懷魯連子城中還憶平原君

金
卷十二
加禽逐獸無窮已西山銜日牙旗紫使君夜獵入孤城
城上寒鴉棲復起散騎黃昏度狹斜滿樓燈火宿倡家
稍將血兔牀頭煮卧聽銀箏醉雪花

王嘉謨

河水歌

河水清兮秋日寒瀨有霜兮洲有煙人喧兮岸舟寂寂
兮獨還

子夜歌

采蓮西洲裏歡去不復顧只解惜蓮華不覺蓮子苦

東門吟

西山夜生一片月御苑荷香益清發東門街鼓斷人行
草色隨風上城闕旅客思家對月明遠望平林秋雁聲
幾迴夢裏繞歸興爭奈風沙捲北平

沈瓚

有女篇

有女幽且貞矢志勵高潔廿載處閒房清標皎霜雪衆

女莫敢譏芳名一何烈自信鐵石心同車猥相悅既逐
桃李顏誰識歲寒節逝將申微尚寧辭跡孤子脉脉含
遠情難為彼姝說

徐燭

春宮曲

長信宮中玉漏微綠楊枝上乳鶯飛忽聽銀鑰開金鎖
殘月樓頭照舞衣

章士雅

柳枝詞

長淮渡頭楊柳春
長淮市上酒旗新
繫船沽酒折楊柳
還是去年西渡人

湖上曲

白蓮花開秋水生
蘭橈桂楫羅衣輕
郎君試看花深處
兩兩鴛鴦飛不去

孫羽侯

擬古樂府

郎船泊湖頭儂船傍湖曲夜半風浪生移船相並宿

區大相

淮浦吟

淹泊清淮浦悵望丹水涯狂風吹我舟不得早還家

解一

征夫念閨人非為顏色好遊子戀故鄉非關萬里道

解二

謝肇淛

春怨

長信多春草愁中次第生君王行不到漸與玉階平

秋怨

明月憐團扇西風怯綺羅
低垂雲母帳不忍見銀河

王樂善

春宮曲

楊花風散滿池塘倚檻
看來暗自傷紅粉爭如風裏絮
化萍猶得傍鴛鴦

秋宮曲

一從金殿鎖娉婷春鳥秋蛩
祇自聽惆悵無心還乞巧

潛來花下拜雙星

韓上桂

秋江月

秋江月月在秋江如可掇秦時曾照玉龍堆漢世常穿
金鳳闕鳳闕清輝映畫樓風生洲渚錦帆秋白雲一去
迷前浦江水東迴逐月流光一何皎客愁一何悄玉
盤滅沒波盈盈彩袖飄飄蘇小小揚子江頭見月光華
堂寶燭奪輝煌魚龍寂寞金波冷烏鵲依微玉樹涼濯

濯芙蓉雙蒂斷怯怯鴛鴦比翼狂比翼鴛鴦自成匹獨
眠孤婦不勝泣春去秋來恨幾時月圓月缺嗟何及錦
帳蕭條可奈秋惜芳人倚木蘭舟金閨草閣還同照紈
扇蛾眉一樣愁幾度霜寒聽暮笳沉堪羌笛落梅花江
城大地三千里江月斜懸四五家良人幾戍交河北妾
夢空驚海上槎海上槎歎秋月任爾團團比玉容胡不
雙雙對玄髮千門萬戶竟能為七寶三窟望空絕姮娥
既老不嫁人吳公持斧何時歇徒有無情桂樹香不見

多心連理結以茲感歎減朱妍誰分輕鬟襯繞蟬翡翠
樓前鈎獨上珊瑚案上鏡虛懸拚無藥物能奔托拚無
服食可神仙東家流水西家挹南陌栽花北陌寒曉漏
銅樓雞欲歇此時不見秋江月秋江月落影沈沈美人
一笑千黃金人生百年難百歲何處雙心共一心雙心
雙意徒為爾願逐流光赴蒙汜蒙汜雖沈猶有回獨無
人故可重來思君不見憐秋月化作朝雲暮雨臺

子夜歌

月光欲沒花含煙嶺頭遊客愁不眠池中小蓮新貼水
林外輕桃帶露鮮隔牆近在誰家子婉轉歌聲常入耳
吳趨未下楚姬迎玉笙初罷文簫起銀河燭影夜沈沈
寶熱蘭薰香十里共道千金買醉宵何知孤客憐春芷
憐春芷歎春聲慘切流鶯暗自驚關河北去人如夢祇
是相思一路明

采蓮曲

采蓮復采蓮採蓮方未已翠羽拂雲平輕橈乘浪起越

女嬌嬌世所無玉環繫腕色甚都相將結伴尋芳去但
得芙蓉莫浪趨芙蓉淺淺峽江側近水輕盈淨如拭將
歸東岸隔西潯欲住汀南限溪北汀南溪北一朝花採
蓮誰得似娼家不憎綠水漸羅袂但恨鴛鴦占浦沙浦
上鴛鴦兩兩飛翠莖丹艸自相依渚口初聞乘月去隔
江猶唱採蓮歸採蓮曲歡未足一路歌聲入綵雲相看
翠袖飄紅玉思君為擢藕如船斷却長絲恨轉連蒂似
妾心空自苦花當妾貌好誰憐採蓮秋已暮歸來月如

素塞外音書杳不聞江南年少空相慕
摘盡紅蓮悵遠天回看往路空寒煙可憐
江上如花女為採蓮花學刺船

紫陌行

并序

乙未春罷對自長安抵敝廬時春氣盛敷
遊觀絡繹而余獨蹇行道中不勝壹鬱之
感雜以成篇

聖朝明日麗中天漢代祥雲接御煙
百二關河開錦繡三千龍虎護幽燕
幽燕士女多婉孌洛渭風塵同眷戀

但學吹簫駕碧空。豈惜鳴鑾買歌扇。曉漏銅龍報早春。
青陽景物動芳辰。太史書雲呈玉葉。將軍履劒動勾陳。
嶺外調風應衡端。淑氣臻文從星漢。轉治逐斗杓。新斗
杓星漢浮蘭汜。象管鸞笙催帝里。羅浮山上月銜梅上
苑林中雲綴李。共道朝來鬪綵春。誰知臘裏偷寒芷。春
氣競萌芽。春光照碧沙。枯崖藏翠草。古木發瓊葩。渭水
橋邊千萬戶。武陵源上兩三家。流風一泝龍城遍。往日
關河如自變。水濯黃金條。庭抽青玉線。江雲黯黯度遊

龍江雪融融濕飛燕飛燕翩翩上畫梁遊絲雜沓卷垂

楊朱門鎖後誰衝鑰衡宇開斜亦任香沈吟報道春將

度俠客妖容滿前路紫帶珠纓絡玉騶銀絲鐵網妝瑤

輅照人寶劒遞成行映日金環移遠步金環寶劒逼冷

冷牽車策馬未曾停何處依微開古剎何處陰深度帝

京龍鞭輕指點寶勒近丁寧相看一水隔並笑百花明

仙郎此去同誰伴浮英落縷爭相半丹衢九道接重樓

紫陌千條橫廣漠磴路複崖雪未稀銅溝別墅冰將泮

為尋春色倚嵯峩誰料春心繫
蔦蘿驅馳豈憚金川水
窈窕還臨寶鏡波北渚夜來少
南山朝更多同為鬪草
戲齊作採蘭歌相顧紅顏私懊惱
人生安得長美好去
年花比今年饒今年春比去年早
聞道宮城輦道東照
人丹杏挹春風江心小李不同白
洞口纖桃一樣紅茶
蘼架上棲雙鳥楊柳溪頭落並鴝
荷衣新試淺柏蓋舊
成叢漱水珠花射敲冰夾氣衝行行
更向曲江滸兩岸
落花急帶雨青萍碎出日還浮弱
荇微牽風更舞錦瑟

佳人嬌上春吹笙王子結成鄰有情飛鳥能相伴無意
遊蜂祇自嗔雙雙蛺蝶銜鬚並匝匝鴛鴦比翼頻抽手
為郎折江芷更上一枝春更美繁棘牽裳步却難淩波
度襪泥防滓但取嫣然效妾歡何辭婉轉為君死簫鼓
中流發浩音桂棹輕移傍綠陰雲鬟闌出千峯玉寶靨
斜開萬樹金萬樹霏微但一色水底龍文涵湜湜葡萄
樽下幾傾紅竹葉杯中頻送碧錦帶同心結香桂連理
織眼前一片歡別後庸相識遲遲落日挂春暉只可貪

花滿袖歸芳潭紫萼攜來重碧沼朱英恨不違歸鞍競
隘關前轂冉冉紅塵散金谷翡翠支持草際深珊瑚錯
落花中蹴止水猶含旖旎香竹梢尚繫輕盈轂寂寞空
林野鳥啼淒涼暮雨山猿哭目極蕭然悵遠遊早春何
地不消愁亦有花間題紈扇亦有袖裏覓銀鈎從前已
對蟾蜍月別後新添鵲鵲樓始信太平多景象蕙葉蘭
文波泱泱盛年春色住盤龍滿目風光留戶網獨有經
行客子悲貂裘已破黃金資風流不減張京兆磊落誰

嗟向子期琴心懶奏鳳凰曲彩筆羞裁芍藥詩茫茫天
地一何大石澗飛蟲遞鳴籟輕風不散故鄉愁細草長
縈行野嘅祇有南枝號合歡謾說忘憂樹北背塵生菜
甌幾憐人病處牛衣徒自悔振翮何時入御堤上林還
借一枝棲手調商鼎鹽梅和曲應虞絃舞袖低涸鮒亦
思迴潤轍枯楊猶自發榮秣春風一夕能相識鷹作鳩
聲亦解啼

東征歌

十萬旌旗閃絳雲三千龍虎鎮雄軍
師行不用傳刁斗夜半天雞徹曉聞

天兵繚繞下勾陳玉女飛符指過津
近見蓬萊較清淺多因車馬蹴成塵

陳价夫

秋夜詞

殘燈隱壁秋魂苦榕葉翻風桂花雨
誰遣衰蛩上井欄陳根一一悲相語
崩雲漏雨宵中白皺縠窓煙鏤雲碧

銅龍咽盡東方高浮塵穰穰城西陌

聽鏡詞

憶昔與君生別離鏡似樂昌初破時自嗟桂魄幾圓缺
遠人尚自愆還期轆轤無繩瓶墜井青燈熒熒照孤影
含愁抱鏡入中厨呢呢低聲自陳請漏短不知夜幾更
四鄰已盡無人聲憂疑未決心轉苦起步明月沿階行
倚欄脉脉望河漢鸚鵡籠中巧相喚忽言半月在迴廊
始卜郎回在月半深深再拜喜不眠舉頭看月尚未圓

回身再問匣中鏡知汝何時飛上天

陳薦夫

采蓮曲

采蓮下橫塘兩岸明月光花陰唱吳歌驚起雙鴛鴦

一解

愛彼雙鴛鴦同飛隔江水雖則隔江水寸心良在此

二解

江水何淼茫來船愁殺郎荷花如儂豔荷葉如儂長

三解

儂長正如彼儂豔復如此今朝荷花開明朝荷花死

四解

邯鄲少年行

陌上春風塵土飛，邯鄲年少紫羅衣。
貂裘獨擁王孫去，珠履雙分公子歸。
王孫公子爭相羨，寶馬香車去如電。
飛夢畫棟出雲間，舞館歌臺臨水面。
楊柳陰中百轉鶯，簾櫳影裏雙飛燕。
飛燕流鶯白玉欄，繁絃急管度春寒。
舞衣照耀殊方彩，歌扇飄颻雲錦紈。
東樓紅粉青絲管，南國金貂坐間滿。
當筵莫惜錦纏頭，楚舞吳歌夜不休。
年年今日復明日，白髮紅顏遞相失。
即今欲見少年時，流水無情不可知。

楊花曲

簾幕重重日影移
欄干曲曲曉雲垂
綠楊窓外鶯啼後
青草池邊燕語時
鶯啼燕語芳春早
飄落楊花滿春草
遼陽征客心獨傷
東鄰美人亦斷腸
不堪西路音塵絕
愁對東風羅綺香
時時抽妾相思緒
織作衣裳送君去
回文織罷情轉真
請看此物為妾身
枝上楊花枕邊淚
一夜東風兩相墜
此時君若見楊花
妾與楊花共憔悴

關山月

明月滿關山
征人去不還
深閨與邊塞
萬里月明間
孤影照歸夢
流光啼玉顏
自憐嬌小婦
不及大刀環

子夜四時歌

采桑入南園
園中草芊芊
雙飛蝴蝶子
戲儂羅裾前
柳枝生池上
柳葉拂池水
歡來樹下坐
綠葉自旖旎
月出桂樹叢
斗帳望如空
涼風發窓牖
照見歡與儂
北風吹霜雪
肌膚凍欲裂
羅襦空爾馨
獨眠那得熟

子夜歌

不見金鈿鉤火盛柄自薰裁衣持寄郎郎溫儂亦熱

柳枝詞

陌上千枝復萬枝春來誰不寄相思長安多少堪栽樹
却種柔條引別離

浣衣曲

幽荷冉冉新篁密皺縠含風波浸日靚妝融冶粉紅香
淺碧銀塘映花立雙雙玉腕漾清漪霧縠搖波光陸離
不因驚起鴛鴦伴花外玉郎那得知

竹枝詞

荷葉田田柳葉垂
千船萬船多女兒
與郎暗約花間去
不唱竹枝知是誰

古意

黃蘗種作籬圍繞
合歡樹不見合歡時
但見生離苦



御選明詩卷十二



總校官庶吉士臣侍朝

校對官檢討臣蕭九成
謄錄舉人臣傅瓌芳